

宋史

第十一册

新
平
舟

PDG

宋史卷四十六

本紀第四十六

度宗

度宗端明武景孝皇帝諱禛太祖十一世孫父嗣榮王與芮理宗母弟也嘉熙四年四月九日生於紹興府榮邸初榮文恭王夫人全氏夢神言帝命汝孫然非汝家所有嗣榮王夫人錢氏夢曰光照東室是夕齊國夫人黃氏亦夢神人采衣擁一龍納懷中已而有娠及生室有赤光資識內慧七歲始言言必合度理宗奇之及在位歲久無子乃屬意託神器焉淳祐六年十月己丑賜名孟啟以皇姪授貴州刺史入內小學七年正月乙卯授宐州觀察使就王邸訓習九年正月乙巳授慶遠軍節度使封益國公十一年正月壬戌改賜名孜進封建安郡王寶祐元年正月庚辰詔立爲

皇太子改賜今名癸未授崇慶軍節度使開府儀同三司進封永
嘉郡王二年七月以宗正少卿蔡抗兼翊善時資善堂初建理宗
制堂記書以賜王十月癸酉進封忠王十一月壬寅加元服賜字
邦壽五年十月庚子授鎮南遂安軍節度使景定元年六月壬寅
立爲皇太子賜字長源命楊棟葉夢鼎爲太子詹事七月丁卯太
子入東宮癸未行冊禮時理宗家教甚嚴雞初鳴問安再鳴回宮
三鳴往會議所參決庶事退入講堂講官講經次講史終日手不
釋卷將晡復至榻前起居率爲常理宗問今日講何經荅之是則
賜坐賜茶否則爲之反覆剖析又不通則繼以怒明日須更覆講
二年正月丁丑謁孔子於太學請以張栻呂祖謙列從祀十二月
癸卯冊永嘉郡夫人全氏爲皇太子妃五年十月丁卯理宗崩受
遺詔太子卽皇帝位戊辰尊皇后謝氏曰皇太后生日爲壽崇節

庚午宰執文武百官詣祥曦殿表請聽政不允辛未大赦十一月
壬申宰執以下日表請視朝不允丁丑凡七表始從丙戌帝初聽
政御後殿命馬廷鸞雷夢炎兼侍讀李伯玉陳宗禮范東叟兼侍
講何基徐幾兼崇政殿說書詔求直言又詔先朝舊臣趙葵謝方
叔程元鳳馬光祖李曾伯各上言以匡不逮召江萬里王爚洪天
錫湯漢等赴闕詔躬行三年喪復濟王竑元贈少師節度使追封
鎮王諡昭肅有司討論墳制增修之加封嗣榮王與芮武康寧江
軍節度使依前太師判宗正事詔撫勞邊防將士監察御史劾宦
官李忠輔何舜卿等賊辜竝竄遠方戍戍詔儒臣日侍經筵輔臣
觀講乙未命洪天錫以侍御史兼侍讀十二月辛丑詔改明年爲
咸淳元年行銅錢關子率貫以七百七十文足壬寅戒賊吏絕貢
羨餘申辰詔以生日爲乾會節初開經筵講殿以熙明爲名禮部

尚書馬廷鸞進讀大學衍義序陳心法之要是歲兩浙江東西湖
南北廣東西福建成都京西潼川夔利路戶五百六十九萬六千
九百八十九口一千三百二萬六千五百三十二大理寺奏大辟
三十三人

咸淳元年春正月辛未朔日有食之丞相賈似道請爲總護山陵
使不允尋下詔獎諭癸酉直學士院畱夢炎疏畱似道甲戌諫議
大夫朱勳孫等亦請改命不報詔臨安免征商三月丙子京湖制
置使呂文德辭免不允二月庚申置籍中書記諫官御史言事歲
終以考成績三月癸酉似道乞解機政不允壬午京湖制司劄招
鎮邊軍甲申葬理宗於永穆陵夏四月壬寅賞四川都統胥萬壽
雲頂山金堂峽之功及其將士丁未壽崇節免徵臨安官私房僦
地錢戊申乾會節如上免徵再免在京征商三月自是祥慶災異

寒暑皆免戊午質似道特授太師己未幸景靈宮發米八萬石贍京城民夔路都統王勝以李市沙平之戰獲功轉官兩資將士效力者上其名推賞五月己巳追命史彌遠爲公忠翊運定策元勳閏月乙巳久雨京城減直糶米三萬石自是米價高卽發廩平糶以爲常丁未發錢二十萬贍在京小民錢二十萬賜殿步馬司軍人錢二萬三千賜宿衛自是行慶恤災或遇霖雨雪寒咸賜如上數以江萬里參知政事王燿同知樞密院事權參知政事馬廷鸞端明殿學士簽書樞密院事丁巳以錢三十萬命臨安府通鸞平物賈丁卯故成都馬步軍總管張順歿於王事詔特贈官五轉其子與八官恩澤六月乙酉名理宗御製之閣曰顯文置學士直學士待制直閣等官戊子沿海制置使葉夢鼎三辭免不允己丑名理宗原廟殿曰章熙秋七月丁酉太白書見初命迪功郎鄧道爲

韶州相江書院山長主祀先儒周惇頤壬寅參知政事江萬里乞
歸田里不允戊申夔路安撫徐宗武城開達石城乞推恩從之王
戊督州縣嚴錢法禁民間用啤帖癸亥以諒陰命宰執類試阮登
炳以下依廷試例出身禁在京置窠柵私繫囚八月庚辰命陳奕
沿江案閱軍防賜錢二十萬給用丁亥詔有司收民田租或措克
無藝監司其嚴禁戢違禁者有刑甲午大元元帥阿朮帥大軍至
廬州及安慶諸路統制范勝統領張林正將高興副將孟興逆戰
沒於陳詔勝等各官其一子進勇副尉九月己酉以洪天錫爲工
部侍郎兼侍讀壬子命宰執訪司馬光蘇軾朱熹後人賢者能者
各上其名錄用癸丑呂文德言京湖制帥策應三司官屬乞推恩
詔各進一秩庚申吏部侍郎李常上七事曰崇廉恥嚴鄉舉擇守
令黜貪污讞疑獄任儒師修役法冬十月壬申減四川州縣鹽酒

課始自景定四年正月一日再免徵三年乙亥減田契稅錢什四
庚辰江安州潼川安撫司以攻懷簡小富砦戰圖來上詔優荅以
賞十一月乙未兄少保保寧軍節度使致仕乃裕夢贈少傅追封
臨川郡王

二年春正月癸丑江萬里四請歸田乞祠祿不允以爲湖南安撫
使兼知潭州二月乙巳侍講范東叟奏正心之要有三曰進德曰
立政曰事天上嘉納焉戊寅詔免湖南漕司積年運上峽米耗折
逋直辛卯詔左右史循舊制立侍御坐前三月庚子賞夔路總管
張喜等防護開達軍功將士進官有差乙巳詔郡守兩年爲任方
別授官戊申賜敕書獎諭呂文德夏四月乙丑洪天錫三請祠不
允以顯文閣待制知潭州兼湖南安撫使甲申侍御史程元岳上
言帝王致壽之道在修德後世怵邪說以求之往轍可墜修德之

目有三曰清心曰寡慾曰崇儉皆致壽之原上嘉納之丁亥授信
州布衣徐直方史館編校五月癸丑詔諸節制將帥討軍實節浮
費毋占役兵士致妨訓練六月丁丑給羅鬼國化州印壬午以衢
州饑命守令勸分諸藩邸發廩助之秋七月壬辰祈雨詔以來年
正月一日郊壬寅禮部侍郎李伯玉言人材貴乎善養不貴速成
請罷童子科息奔競以保幼稚良心詔自咸淳三年爲始罷之八
月甲申安南國遣使賀登位獻方物九月丙辰浙西安撫使李芾
以臺臣黃萬石等言削兩秩免冬十一月辛丑兩淮制置使李庭
芝立城屯駐武銳一軍以工役費用及圖來上詔獎勞之乙卯少
師致仕趙葵夔贈太傅賜諡忠靖丁巳利東安撫使知合州張珏
調統制史炤監軍王世昌等復廣安大梁城詔推爵賞有差十二
月丁丑申嚴戢貪之令甲申以請先帝諡祭告天地宗廟社稷丙

戊奉冊寶請於南郊上諡曰建道備德大功復興烈文仁武聖明
安孝皇帝廟號理宗大理寺奏歲終大辟三十五人

三年春正月己丑朔郊大赦丁酉奉皇太后寶上尊號曰壽和辛
丑壽和太后冊寶禮成謝堂等二十七人各進一秩高平郡夫人
謝氏等二十二人各進封特封有差癸卯冊命妃全氏爲皇后戊
申帝詣太學謁孔子行舍菜禮以顏淵曾參孔伋孟軻配享顓孫
師升十哲邵雍司馬光升列從祀雍封新安伯禮部尙書陳宗禮
國子祭酒陳宐中進讀中庸己酉執經官宗禮講經官宐中各進
一秩宐中賜紫章服太學武學宗學國子學宗正等官若醫官監
書庫門庖等各進一秩諸齋長諭及起居學生推恩有差乙卯壽
和太后親屬謝奕修郭自中黃興在等二十八人各升補一秩二
月己未克復廣安軍詔改爲寧西軍庚申馬光祖再乞致仕不允

乙丑詔賈似道太師平章軍國重事一月三赴經筵三日一朝治
事都堂丙子樞密院言知夔州夔路安撫徐宗武勅立臥龍山堡
圍詔宗武帶行遙郡團練使以旌其勞三月癸卯知房州李鑑及
將校杜汝隆夏喜以戰龍光砦有功優與旌賞夏四月庚申壽和
太后兩次冊寶族兄弟謝奕實等十五人族姪謝在達等四十七
人族姪孫謝鏞等十四人各賜銀十兩帛十四匹詔太中大夫全清
夫儒科發身懇陳換班靖退可尙特授清遠軍承宣使提舉佑神
觀仍奉朝請乙酉張珏護合州春耕戰款龍谿以狀言功詔趣上
立功將士姓名五月丁亥朔日有食之戊申詔曰比常命有司案
月給百官奉惟官愈卑去民愈親仍聞過期弗予是吏奉吾命不
虔也諸路監司其嚴糾劾六月壬戌加授呂文德少傅馬光祖參
知政事李庭芝兵部尙書並職任仍舊皇后受冊推恩弟全清夫

以下十五人官一轉全必禎以下十七人補承信郎癸酉美人楊氏進封淑妃戊寅詔榮王族嫺與萊等三十四人各轉官有差秋七月丁亥張珏授正任團練使帶行左領軍衛大將軍賜金帶壬辰樞密院言右武大夫權鄂州都統汪政鄂城戰禦又焚光化城外積聚及攻真陽城皆有功該轉十二官詔轉橫行遙郡甲午四川都統咎萬壽調統制趙寶楊立等率舟師護糧達渠城以功推賞已酉權黎州張午招諭大青羌主歸義乞用兩林西蕃瑜林仍賜予加優從之八月辛酉遣步帥陳奕率馬軍舟師巡邏江防壬戌邊報緊急詔諭呂文德等申嚴防遏乙丑太師武康寧江軍節度使判大宗正事嗣榮王與芮進封福王主榮王祀事壬申久雨命在京三獄赤縣道司僉廳擇官審決獄訟毋滯九月乙未詔郡縣折收民田租毋厚直取贏違者論臯癸卯知邕州總統譚淵李

旺周勝等繇特磨行大理界率兵攻建水州禽其知州阿孱以下三百餘人獲馬二百餘焚穀米器中廬舍師還論功各轉官三資軍校補轉有差冬十月庚申復開州賜四川策應司錢百萬勞軍甲戌大雷電十一月丙申故左丞相吳潛追復光祿大夫壬寅嘗知房州李鑑調遣路將夏喜統領馮興等均州武陽壩戰功十二月丙辰呂文煥依舊帶行御器械改知襄陽府兼京西安撫副使丁卯臺臣言敘復元宮觀文殿學士提舉洞霄宮皮龍榮貪私傾險嘗朋附丁大全乞寢新命詔予祠祿

四年春正月癸未賜呂師夔紫章服金帶己丑呂文德言知襄陽府兼京西安撫副使呂文煥制鄂都統制唐永堅蠟書報白河口萬山鹿門山北師興築城堡檄知郢州翟貴兩淮都統張世傑申嚴備禦癸巳故守合州王堅賜廟額曰報忠癸卯沔州駐劄潼川

安撫副使咎萬壽特升右武大夫帶行左驍衛大將軍賜金帶已酉印應雷改知慶元府兼沿海制置使庚戌詔曰邇年近臣無謂引去以爲高勉畱再三弗近益遠往往相尙不知其非義也亦由一二大臣嘗勇去以爲眾望相踵至今孟子於齊王不遇故去是未嘗有君臣之情也然猶三宿出晝庶幾改之儒者家法無亦取此乎朕於諸賢允謂無負其弗高尙使人疑於負朕閏月庚午賜夏貴金帶夏四月壬午湯漢三辭免刑部侍郎福建安撫使庚寅乾會節帝御紫宸殿羣臣稱賀上曰謝方叔託名進香擅進金器諸物且以先帝手澤每繫之跋率多包藏至以先帝行事爲已功殊失大臣體宜鐫一秩於是盧鉞等相繼論列方叔昨蜀廣敗事誤國殄民今又違制擅進削一秩罰輕詔削四秩奪觀宸殿大學士惠國公罷宰臣恩數仍追寶奎錄并繫跋眞本來上丙申右正

言黃鏞言今守邊急務非兵農合一不可一曰屯田二曰民兵川蜀屯田爲先民兵次之淮襄民兵爲先屯田次之此足食足兵良策也不報丁酉詔故修武郎姚濟歿節立廟賜額曰忠壯五月辛酉樞密都承旨高達再辭侍衛都虞候乞歸田里命孫虎臣代之壬申賜陳文龍以下六百六十四人進士及第出身丙子賈似道乞骸骨不允六月辛巳葉夢鼎再乞歸田里不允詔罷浙西諸州公田莊官募民自耕輸租租減什三毋私相易田違制以盜賣官田論秋七月戊午有星出氏宿西北急流入騎官星沒己未淑妃楊氏親屬楊幼節以下百三十四人推恩進秩八月壬寅奉安寧宗實錄理宗實錄御集日曆會要玉牒經武要略咸淳日曆玉牒賈似道葉夢鼎馬廷鸞各補轉兩官諸局官若吏推恩有差九月癸未太白晝見大元兵築白河城始圍襄樊冬十月戊寅朔日有

食之子憲生參知政事常挺六乞歸田里詔予郡己亥己減四川
州縣鹽酒課詔自咸淳四年始再免徵三年十一月癸丑樞密院
言南平紹慶六郡鎮撫使韓宣城渝嘉開達常武諸州有勞繇峽
州至江陵水陸措置盡瘁以歿宐視沒於王事加恩詔宣守本官
致仕任一子承節郎仍贈正任承宣使丁巳詔知江陵府陳奕裨
將周全王德等戰西山南谷口田家山有功各以等第推賞戊午
子隍生丙寅福建安撫使湯漢再辭免乞祠祿詔別授職辛未以
文武官在選困於部吏隆寒旅瑣可閔詔吏部長貳郎官曰趣餘
注小有未備特與放行違者有刑自是隆寒盛暑申嚴誠飭常挺
卒贈少保壬申行義役法十二月辛卯以夏貴爲沿江制置副使
兼知黃州癸巳史館狀理宗實錄接續起修張九成孫象先力學
飭行不墜家聲其免一解示表厲命建康府建南軒書院祠先儒

張栻戊戌汪立信知潭州兼湖南安撫使職任依舊乙巳詔賞京湖總管張喜趙萬等石門阪堰戰功

五年春正月丁未以李庭芝爲兩淮安撫制置大使兼知揚州壬子京湖策應司參謀呼延德領諸將張喜等遇北兵戰於蠻河癸亥葉夢鼎奏章請老畱之固辭依前少保判福州福建安撫使封信國公以馬廷鸞參知政事兼同知樞密院事甲戌以江萬里參知政事二月戊子江萬里辭免參知政事不允三月丙午北師圍朮自白河以兵圍樊城甲寅葉夢鼎辭免判福州福建安撫使詔不允乙卯皇后歸寧族姍推恩保信軍節度使全清夫以下五十六人各進一秩咸安郡夫人全氏以下三十二人各特封有差大元兵城鹿門己未詔浙西六郡公田設官督租有差辛酉京湖都統張世傑率馬步舟師援襄樊戰於赤灘圍戊辰以江萬里爲左